

Had Kifayah hasil kajian UMP dengan kerjasama Pusat Kutipan Zakat Negeri Pahang



Kuantan, 1 Jun- Pusat Bahasa Moden & Sains Kemanusiaan Universiti Malaysia Pahang (UMP) menganjurkan Persidangan Zakat dalam Pembangunan Ekonomi Peringkat Kebangsaan 2015 bertemakan "Zakat Pemacu Ekonomi Ummah."Perkongsian melibatkan pakar dalam sesi ucap-tama, forum dan pembentangan 35 kertas kerja membicarakan tentang mekanisme penyelesaian kepada masalah kelemahan ekonomi umat Islam dan perjalanan, pelaksanaan dan amalan sistem ekonomi Islam khususnya zakat di Malaysia. Ianya juga berjaya membincangkan kaedah yang sistematik dan praktikal bagi memperkasa pelaksanaan sistem zakat di Malaysia dalam aspek penerimaan dan pengagihannya.

Menurut Pemangku Timbalan Naib Canselor (Akademik dan Antarabangsa), Profesor Dr. Wan Azhar Wan Yusoff yang hadir mewakili Naib canselor UMP berkata, bagi mencapai keseimbangan tersebut, pastinya hal-ehwal tadbir urus, kutipan dan agihan zakat memerlukan satu kerangka dan hala tuju yang terarah, dengan dimudahcara oleh dasar yang bersesuaian oleh pemerintah dan undang-undang yang khusus untuk dikuatkuasakan.

“Perubahan masa, peredaran zaman dan perkembangan teknologi telah banyak mentransformasi gaya hidup dan corak pemikiran kita. Maka dewasa ini, masyarakat kita lebih kritis sifatnya dalam menilai pelbagai perkara di hadapan mereka, dan soal tadbir urus serta fungsi ekonomi zakat sentiasa mendapat perhatian.”

“Oleh yang demikian, institusi zakat di negara ini sentiasa tercabar untuk mengekalkan kewibawaannya, khususnya dalam aspek sistem penyampaian perkhidmatan bagi mengekalkan keyakinan masyarakat secara berterusan, tanpa sebarang keraguan,” katanya berucap di Hotel MS Garden Kuantan.



Selain itu, katanya ianya bukan satu tugas yang mudah, kerana pentadbiran intitusi zakat itu sendiri melibatkan pengurusan sumbangan dana awam dalam jumlah yang amat besar. Oleh sebab itulah, bagi mengupaya zakat sebagai instrumen pembangunan ekonomi ummah, aspek tadbir urus korporat institusi ini perlu sentiasa diberikan perhatian yang serius secara strategik oleh pihak berkuasa agama Islam di setiap negeri.

Tambah beliau, dalam konteks tersebut, mekanisme tadbir urus zakat di setiap negeri yang beroperasi berteraskan model kawalan penuh Majlis Agama Islam Negeri atau model kawalan penuh institusi zakat yang khusus atau model kawalan bersama Majlis Agama Islam Negeri dan institusi zakat perlu mendapak konsep akauntibiliti kewangan yang profesional menurut etika Islam dan standard antarabangsa.

Dalam hubungan tersebut, UMP sentiasa komited untuk terus bekerjasama dengan pihak berkuasa agama Islam di negeri Pahang dan juga negeri-negeri yang lain bagi mengembangkan penyelidikan ilmiah berkaitan zakat dari pelbagai perspektif dan disiplin berasaskan realiti semasa dengan solusi yang praktikal.

Bagi tujuan ini, UMP memiliki kepakaran dan modal insan dari kalangan akademia di Pusat Bahasa Moden & Sains Kemanusiaan dan juga Pusat Islam & Pembangunan Insan (PIMPIN) yang berminat untuk mendalami kajian-kajian yang berkaitan dan sekaligus berupaya memberi nilai tambah kepada pemerksaan institusi zakat sebagai tunjang ekonomi umat Islam.

Pada masa ini, Pusat Bahasa Moden dan Sains Kemanusiaan Universiti Malaysia Pahang (UMP) dengan kerjasama Pusat Kutipan Zakat Negeri Pahang telah menjalankan penyelidikan mengenai Had Al-Kifayah iaitu garis kecukupan untuk perbelanjaan isi rumah di negeri Pahang. Penyelidikan ini mengambil masa hampir setahun dalam menentukan kayu aras terhadap kutipan dan pengagihan zakat dengan lebih tepat.



Dengan kerjasama kakitangan Pusat Kutipan Zakat, seramai 15 00 responden daripada seluruh negeri Pahang, meliputi pelbagai jenis latar belakang dan demografi, telah dipilih untuk terlibat di dalam penyelidikan ini yang diketuai Profesor Madya Dr Hasan Ahmad dan Dr Mansor Sulaiman. Kajian membabitkan latar belakang sebenar isi rumah di negeri Pahang, termasuk pendapatan dan juga perbelanjaan. Data yang diperolehi dipadankan dengan senarai barangan asas keperluan berdasarkan syariat dan juga piawai COICOP UN, seterusnya menghasilkan sistem pengiraan yang paling tepat untuk menggambarkan jumlah sebenar yang diperlukan oleh isi rumah untuk hidup di luar garis kemiskinan.

Sistem Pereka kalkulator Had al-Kifayah yang turut dikenali dengan KifayaCalc 1.0, ini unik kerana ianya meliputi responden yang pelbagai yang bukan hanya melibatkan golongan miskin tegar sahaja, justeru gambaran sebenar kos kehidupan dapat dihasilkan. Lebih 200 orang hadir dalam persidangan yang turut dihadiri Mufti Negeri Pahang, Sahibus Samahah Dato' Sri Haji Abdul Rahman Haji Osman, Mufti Negeri Kelantan, Sahibus Samahah Dato' Haji Mohammad Shukri Mohamad dan Timbalan Mufti Kerajaan Negara Brunei Darussalam. Hadir sama Dekan PBMSK, Profesor Madya Dr. Muhammad Nubli Abdul Wahab dan Pengarah persidangan, Dr. Mansor Sulaiman.

Disediakan Bahagian Komunikasi Korporat PNC

Posted By : NOR FADZILLAH BINTI ZULKIPLI Date Posted : 02-06-2015, 09:54:12